

國朝詩人徵略二編

國朝詩人徵略二編卷三十六

番禺張維屏子樹輯

福康安

姓富察字瑞林滿洲鑲黃旗人官大學士封一等公晉封貝子贈郡王

公父傅恆大學士

國史有傳公以乾隆三十二年由雲騎尉授三等侍衛洊擢至一等自乾清門入直

御前三十六年授戶部侍郎三十七年大兵征金川

命溫福爲定邊將軍阿桂爲副將軍福康安爲領隊

大臣齊印往軍中三十八年六月木果木失事以  
阿桂爲定西將軍分道再舉三十九年會同領隊  
海蘭察克山礮數十殲賊數百四十年攻得楞山  
焚寨數百授內大臣克榮噶爾博山

賜嘉勇巴圖魯號益力戰冒鎗石遂克勒烏圍四十  
一年圍噶拉依礮擊其寨二月逆酋索諾木就縛  
金川平封三等嘉勇男獻俘馘

上幸良鄉行郊勞禮

賜御用鞍轡馬一繪像紫光閣轉戶部左侍郎  
賜雙眼花翎紫禁城騎馬四十二年授吉林將軍四

十三年調盛京將軍四十五年授雲貴總督四十六年調四川總督四十七年擢

御前大臣加太子大保四十八年署工部尚書

命往廣東查鹽商捐備貢物事四十九年擢兵部尚書總管內務府大臣甘肅逆回田五滋事授參贊大臣同將軍阿桂會勦授陝甘總督統兵進勦殲賊數千生擒賊首晉封嘉勇侯五十年轉戶部尚書五十一年轉吏部尚書協辦大學士五十二年臺灣逆賊林爽文圍嘉義縣

命爲將軍偕參贊大臣海蘭察往勦親率巴圖魯衝

入賊中焚賊寨餘匪皆殲焉封一等嘉勇公

賜紅寶石頂四團龍補褂五十三年正月令侍衛及兵數百易裝入緝生擒林爽文俘獻京師

上親解佩囊賜之二月追執兇渠莊大田以獻臺灣平賜金黃腰帶紫韁金黃繡珊瑚朝珠

命於臺灣郡城建生祠塑像又奏善後十六事調閩浙總督五十四年調兩廣總督奏安南阮光平糾衆擾邊奏請前往五十五年率安南國王阮光平來朝尋以廓爾喀賊擾後藏

命爲將軍偕參贊海蘭察往征之五十七年抵後藏

率衆進剿殲賊目三賊衆二百生擒十餘進攻濟  
甯自丑至亥克其寨斬級六百生擒二百大兵至  
旺堆分三路進攻賊大潰進攻甲爾古拉集木集  
賊八千人來援接戰兩晝夜戮賊目十三賊六百  
賊酋懼乞降遂班師實授大學士加封嘉勇忠銳  
公調四川總督五十九年調雲貴總督六十年貴  
州逆苗石柳鄧圍松桃廳湖南逆苗石三保圍永  
綏督兵赴剿連解三圍

賜三眼花翎大兵五路分剿乞降者七十餘寨晉封  
貝子爵銜時所謂粵西兵亦至今花連布率之將

由平隴以復乾州進取驃馬峒諸山焚其寨三百  
嘉慶元年攻火麻營石城軍中製火箭數百遠近  
齊發燬其寨奪山梁七五月染瘴患洩瀉猶督師  
前進夜有大星隕於營西北光芒有聲越數日卒  
於軍晉贈郡王爵銜

賞內帑銀一萬兩經理喪事並給陀羅經被奉

旨入祀昭忠祠賢良祠配饗

太廟諡文襄子德麟承襲貝勒之爵

聽松廬文鈔

尚書李芝齡師撰福文襄公傳將及萬言余撮爲

千餘字其大略已具矣

松軒隨筆

貝子援諸羅時壯勇公海蘭察前行貝子督師繼  
進夜大雨遇土山駐軍山頂貝子中坐隨軍官圍  
貝子坐外親軍外正軍皆圍坐賊遊兵近山過火  
炬千萬賊上窺山黝黑無所見疑有軍發銃礮擊  
之貝子令曰無出聲無動久之賊過盡雨霽天明  
壯勇公已入諸羅城捷使至軍始起行無一傷視

銃礮子歷落入山腹也

大雲山  
房文集

貝子征衛藏有隘道幾一里賊屯軍守隘北甚嚴  
大軍屯隘南三十里許貝子調軍伏隘東西而以  
前軍攻隘迭迭進戰一日貝子在大軍中軍報



脊至不動及二更前軍敗退賊逐前軍出隘南忽  
銃礮聲大震火炬照耀如白晝東西伏軍皆起賊  
驚退相蹂躪我軍蹙之入隘貝子急上馬萬騎齊  
足頃刻至隘口前軍伏軍已過隘聞貝子至勇氣  
百倍大軍乘勢合攻遂夷賊屯

同上

福貝子寄惠椿亭侍郎詩云少年許

國兩心同紫陌紅塵並玉驄無那天風分雁序君行

西塞我遼東

雅頌 熙朝

摘句 料得天涯勞遠夢滇風蜀雪又秦雲

手把鞭梢指蔥嶺故人還在玉關西

國朝詩人徵略二編卷三十七

番禺張維屏子樹輯

李長庚

字超人號西巖福建同安人乾隆三十六年武進  
士官至浙江提督封三等壯烈伯諡忠毅有李忠  
毅公詩集

公幼學書卽書唐李白句天生我材必有用贈公  
大奇之命以今名性篤孝母余太夫人疾衣不解  
帶數月免喪補武生舉乾隆庚寅恩科鄉試明  
年成進士授藍翎侍衛年二十六出爲浙江衢州

都司六年擢游擊又六年由叅將擢副將林爽文之亂入閩護海壇鎮總兵鄰境有被刦者誤指爲海壇界落職畱緝公不申辯遽出洋擒盜首林權又擒盜於大岞盜善火器公竿鏹斷其船繚跳登之賊火燎公鬚短兵接大獲而返時總督爲郡王福康安訪水師將材獨禮異公公慷慨言曰長庚毀家爲國船旣自造軍食器械不資於官惟火藥非私家物願有請於是督府檄沿海凡李某調用軍火不限多寡與之嘉慶元年授定海總兵純皇帝召見獎諭有加明年擊蔡牽白犬洋功最

賜花翎公獲海盜有名目者數十人賊中口號曰甯  
遇千萬兵莫遇李長庚蓋自嘉慶之元迄丁卯歷  
十二年無一日不搜捕海盜鬢髮以此白面目以  
此黧而公亦誓死滅賊不復有旋踵想矣六年冬  
擢浙江提督調福建水師提督自

上親政以來專以蔡牽事付公閩浙水師皆屬焉公感激  
上知益思自奮其剿蔡牽也敗之於青龍港覆之於斗米  
洋又大蹙之於鹿耳門以牽船從北汕漏出有  
旨奪翎頂繼敗之三盤又挫之漁山血戰受傷事

聞復頂戴又敗之東湧礮擊牽從子蔡添落海明年

又扼之粵洋大星嶼斷牽船大桅燬其篷索圍甚急若使粵援卽至則牽必計日授首而無如其不至也牽復得脫去

上聞切責粵帥十二月二十五日至黑水洋追及之牽所  
有三舟耳公奮勇欲登舟忽風浪遽作倉猝中礮  
隕命烏虜賊瀕於死屢矣乃桅斷不死舟燬不死  
蹙之絕地不死豈天故欲稽其誅以俟惡稔始殲  
之耶抑天欲彰公之節故使變生不測而賊亦旋  
踵卽滅耶是皆不可知者矣督臣疏入

上震悼爲之墮淚使撫臣迎其喪奠醊

賜帑金千兩封三等壯烈伯於本縣建立專祠

賜全祭葬 賜諡忠毅又累降

旨飭水師將帥爲公復仇 敕督臣用所獲蔡牽義  
子蔡二纓以祭公梟其首喪次

聖代褒忠之典洵無以加矣公所至修學校作義冢見  
義必爲有士大夫所不能者公生於乾隆十五年  
四月二十五日年五十有八配吳夫人子二曰廷  
駒乙卯科武舉早卒曰廷鉦方爲公後承其喪吳  
夫人生女二一字葉寅一適同縣候補同知陳大  
琮今奏畱浙江欲隨大府剿賊以復公仇者也

李忠

李忠毅公墓誌銘陽  
湖洪亮吉撰

王濬本水中之龍高昂亦地上之虎身歷百戰俘  
馘數千始圖掃蕩之功終蹈褻尸之義宜乎寒風  
大樹哀騰兩浙之軍薤唱蒿歌淚灑八閩之水矣  
李忠毅公諱弁序  
鎮洋彭兆蒸撰

李忠毅公爲三軍之帥受

九重之知生榮死哀馨香俎豆可謂一代傳人矣乃其生  
平惓惓惟在讀書有句云涉險有誰能共命讀書  
無日悔當年又示兒句云可記阿爺臨別語讀書  
一事要深維又示次兒廷鈺句云年來頗覺風濤

苦寄語吾兒要讀書每見世之爲士者不知讀書  
之樂而惟他務是營浪擲有用之精神坐消難得  
之歲月試誦忠毅公詩其庶幾翻然悔憬然覺奮  
然興矣乎公外孫陳筠竹通守輯公遺詩刻之昨  
以見示披誦數過因識數語於卷末云

聽松廬  
文鈔

以公之勇以公之忠屢蹙蔡逆奚難奏功乃公詩  
有云海上波濤原不測人間禍福豈能知又云論  
戰有人同性命摧鋒獨我履危機又云萬事關心  
惟討賊却嫌風浪不曾休又云廿年瀚海心原苦  
百戰中流志未酬每於奮厲之中隱寓憂危之意



嗚呼公生由降獄死定騎箕其平日精誠所形於他日臨陣功敗垂成殆若有先見者讀公遺詩既

肅然以敬又不禁愴然以悲也

聽松廬文鈔

聞公有水戰紀略一書公歿書亦亡失余語筠竹別駕當畱心訪購或別有副本亦未可知

松軒隨筆

摘句 海洋長作客舟楫竟爲家

報國自應親矢石酬恩未盡掃鯨魚

難容狡兔藏三窟却藉貔貅共一心

萬頃狂濤除夕夜六年五度未歸家

除夕寄內

侯伯根苗休自棄英雄無種汝須知

示弁兵

國朝詩人徵略二編卷三十八

番禺張維屏子樹輯

顏檢

字惺甫號耘圃廣東連平州人乾隆四十二年拔貢生官至直隸總督有衍慶堂集

公考諱希深歷任湖南雲南貴州巡撫生公兄弟六人公其長也乾隆丁酉拔貢授禮部七品京官升主事員外郎郎中扈蹕灤陽校射連中四矢

賞戴花翎以京察授江西吉安府知府劾墨吏逮蠹役置之法一郡肅然遷雲南鹽法道調迤南道權按察

使安南夷民擾邊界大吏將大舉問罪公曰某請往詰果反卽申討否則毋開邊釁大吏許之公馳赴開化以二十騎往詰擾邊狀檄國王立界石約不得犯境國王如約事定福文襄曰此真封疆才能世其家矣威遠猱札杜反或誘之降已凱旋公曰札杜數反今又示弱患未艾也未幾果畔督府奏以公偕提督往平之三戰擒札杜事定不妄僂一人奏上授江西按察使嘉慶四年

睿皇帝親政遷布政使調任直隸時三省教匪未靖軍書旁午公部署井然旋護督篆疏除旗地加租之令

六年授河南巡撫明年署直隸總督尋實授

賞穿黃馬褂又明年永定河三汛安瀾

欽加太子少保銜直隸民困於役積年虧帑六百萬公以  
日久人衆不可窮治奏請立限彌補完舊逋已強  
半矣新任藩司以易州庫虧揭報公奏自請議處  
仁廟方嚮用公然不欲廢吏議因給主事銜詣

吉地效力又以直隸藩司任內書吏舞弊公坐失察謫戍  
烏魯木齊十三年

召還給主事銜十五年授岳常澧道尋授雲南按察使十  
六年授貴州巡撫復以前直隸失察邪匪降工部

郎中十九年授山東鹽運使擢浙江巡撫林清倡亂後各省多以緝邪教得敘杭俗多持齋誦經者或以謀逆告公廉得實燬其簿民賴以安杭州西湖多停輿偷兒或發匱竊物言官疊上封事公坐庇所屬落職二十四年入都祝

釐除刑部員外郎

今上御極起福建巡撫兼署總督疏陳利弊舉劾並行閩中歲貢建蘭荔支久爲民累公疏請罷有

旨嘉獎永卽停止道光二年復督直隸未幾內召授戶部侍郎調倉場侍郎四年改漕運總督以河淤漕

滯降三品銜後以五品銜休致子伯燾甲戌進士  
由翰林官直隸布政使公歷事

三朝皆受

特達知簡用優隆然屢起屢蹶不得久於其任既老就養

忠愛之忱經濟之蘊未竟於身者還授其子益大

其用嗚呼是可謂全人矣

顏制府墓誌  
長相國撰文

公三世封圻八州旌節門第之盛世業之隆雖漢

之楊鄧唐之李崔不是過也然或者位列棘槐罕

繼風騷之軌望崇棨戟不留詞翰之芬自古福慧

難兼每歎身名俱逝公則千篇詩富一品集成五

言嗣陶韋之音七字參白陸之席而且冰山雪海  
冒暑衝寒絕無嗟怨之辭愈篤忠愛之悃此固大  
臣風範豈徒達士襟懷桑梓必恭典型宛在鯁生  
忝屬鄉人未嘗親炙令子魯與制府苔岑夙契蘭  
訊多疎近從莊寄漁孝廉處借得衍慶堂集讀之  
如見潞國精神因摘其警句錄入茲編并綴數言

書於集後

聽松廬  
文鈔

公詩十一卷以五古爲最其中有淳樸質實者於  
陶詩可稱具體而微後見集陶諸篇妙造自然忘  
爲集古知公平日寢饋於陶集者深矣

聽松廬  
詩話

公塞外詩有足廣見聞者偶錄數句

紅柳育兒兒能嬉

深山中柳樹有物如小兒能食瓜果偶被人獲亦知啼哭謂之紅柳孩紅柳孩亦見紀文達公閱微草堂筆記

白雪擎蓮蓮不壞

蓮花生雪窖中人見隨手卽折得之若一出言則烏有矣

龍潭地湧無波瀾

博克達山頂有龍潭廣數十里水涓滴不下流

鹽井天生絕煎曬

輪臺一帶皆食天生鹽不須火煎不須日曬

集中五律有通體道健者偶錄一二首嘉峪關云

關雄仍照北水逝不朝東

關外水皆西流極目流沙外同

居化宇中天山留雪白邊市映燈紅出塞休惆悵

還思塞上翁 巴里坤云背郭嶺嵯峨環城海不



波背山而海鎮西新府治拱北舊沙陀西北一帶皆沙陀地事紀

唐貞觀唐侯君集姜行本征高昌碑尚存碑留漢永和裴公遺蹟

在悔未一摩挲漢永和二年敦煌太守裴岑碑尚存七律有古意

蒼涼者如大江遠接洞庭湖南國風煙識楚都地

劃荆襄還拱洛水趨東北欲吞吳壯猷人憶孫劉

在哀怨魂招屈宋無千古興懷空灑淚白雲莽莽

罨平蕪大江大有逸情蕭灑者如春光最好二三月

野屋無多四五間老境自憐還自慰柴門常啟亦

常關羨他農圃娛晨夕除却煙霞莫往還獨我與

君緣不淺曾同辛苦又同閒傳竹漪來白泉喜而有作聽松廬詩話

摘句 讀書尋古歡有得輒心喜

近樹無塵容遠山有奇骨

宇宙本來寬何須分中外

塞外游  
紅山作

浮名歸於盡令名當自貽

我情不自達古已有其詞

罷官仍作客適意當還家

人來芳草路春戀落花風

夕陽雲外落新月馬前生

功名兒輩立歲月我身閒

一語存真氣千秋有定評

論詩

碭沛雄風被孫子，淖沱麥飯想君臣。

南陽懷古

徑轉柴扉山到檻，籬編菜圃水依門。

晚眺

偶逢野老談農事，自有佳兒讀古書。

山居

飄泊今成獨飛雁，去畱總是未歸雲。

示燾兒

春夢半酣人已覺，陽關三疊我初經。

出關

能居憂患能尋樂，不羨王侯不學仙。

境逢得意多成悔，事到回頭每覺遲。

感懷

既投世網還須了，能脫名心大是難。

英華氣壯能經世，涵養功深在讀書。

寄莊西樵

獨彈古調有真趣，能破愁懷無變聲。

自題詩卷

柯 輅

字 號淳菴福建晉江人乾隆四十二年舉人  
官汀州漳州臺灣邵武訓導有淳菴詩文集

君少孤事母孝自少貧困刻苦自立中式丁酉科  
舉人大挑二等以教職用所至訓士有方克稱其  
職君性嗜學既爲閒官益以著述爲事所著有讀  
經筆記二十卷山川古蹟錄十四卷文海蠡勺八  
卷詩學摭餘八卷知非得寸錄十卷天文氣候錄  
二卷閩中文獻八十卷閩中詩話十五卷淳菴詩  
文集十二卷君鄉人丁星南

拱辰

以淳菴詩文集

見示亟采其警句刻入詩人徵略二編

聽松廬  
文鈔

摘句

曾聞蘇老泉廿七始下帷又聞高達夫五

十始作詩蘇公文中豪高公詩中奇吾儒

能發憤晚學未爲遲

所以孤高士終辭富貴門

耕勤終藉筆官小喜稱儒

人緣夔事老家以讀書貧

古渡迷芳草斜陽送旅人

關山千里月茅店一聲雞

蟲聲偏近夜雨氣欲生秋

萬山新雨後孤磬夕陽中

難將窮達爭吾命豈以饑寒累丈夫

誰人可許心交友幾個能畱死後名

仕宦不堪惟取巧文人所病在爭名

有祿位既優聲名亦著而其實不過巧  
宦巧宦二字出晉書 聽松廬詩話

有竹已堪文陋屋無田也喜看春耕

海氣噴成三島雨春潮湧出萬軍聲

鹿耳門

世巧太多應乞拙鬚霜如許更逢秋

七夕

鬚髮雖饒今日白菊花不減去年黃

我典舊衣妻典珥惟畱不典一床書

國朝詩人徵略二編卷三十九

番禺張維屏子樹輯

管世銘

字緘若號韞山江蘇武進人乾隆四十年進士  
官御史有韞山堂詩集文集

君進士引見以主事用旋補戶部山東江充軍機  
章京擢員外郎郎中改御史 奏畱軍機處君成  
進士于文襄敏中實爲總裁文襄好士所援引或  
數年至卿貳君未嘗獨求見文襄薨和珅浸用事  
君憂憤每與同官論前代輔臣賢否譏切無所避

和珅微有聞而章佳文成公

阿桂

方倚君如左右

手未有以中傷君君既擢御史構疏稿未成奉

旨畱軍機君謁文成自言愧負此官文成知君意慰之曰報稱有日何必汲汲以言自見耶蓋文成期君大用不欲君以擊奸獲譴也嘉慶四年

朝廷行大賞罰君已前歿不及見已君卒於嘉慶三

年十一月春秋六十有一

管御史墓表  
陸繼輅撰

韞山侍御屢讞外獄嘗曰救生不救死之說最誤

議生罪所以雪死冤但主救生則死者既死於讐

又死於斷而冤不得申矣凡斷獄者宜知之

松心  
日錄



某生以三千金寄韞山處十年還之封識如故此

事在韞山無奇在他人則難能而罕觀矣

松軒  
隨筆

府君居京師從遊之士數百人得府君之教以科

第稱名者歲相繼

侍御行狀管繩萊撰  
繩萊侍御之孫也

余自成童習舉子業少年博愛凡前明制藝及

國朝諸大家名家既溯其源流窺其堂奧矣中年以

後惟愛五家五家者金正希方百川方望溪陳句

山管韞山也今老矣退居江村與漁樵爲伍不談

時文惟韞山之文猶時時誦之嘗謂時文至管韞

山蓋合義理法度書卷聲情融而爲一矣今擇尤

愛者列篇目於左質諸讀管文者松軒隨筆

學而時習之全章 關雎一節 齊一變一節

述而不作一節 雖疏食菜羹一節 回也其庶

乎至施焉 子貢問友一節 有德者必有言一節

唯女子與小人一節 令聞廣譽施於身二句

有若無三句 君子以文會友 素隱行怪二句

孔子成春秋而亂臣賊子懼 二三子何患於喪

乎三句 季氏使閔子騫為費宰一節 樊遲請

學稼全章 晉文公譎而不正一節

此十八篇精闡名理包羅史事洞達物情每於月下雨中燈前枕上背誦之可息閒雜思慮

少時讀葛覃詩而疑之后如歸甯何必詠及汚

澣衣又何必商及害澣害否後讀管韞山詩說乃

釋然也采葛作服后如率宮人爲之言告言歸薄

汚薄澣皆宮人事也是以詩貴善說

松心日錄

標題 題古名人畫像八首 題韋靜山

協夢

儀

禮質疑 乘驛謠 詩文稿失復得誌喜

莫相知行

以上五言古

與周宿航論唐詩

漢金銅仙人歌 華清宮舊址 函谷

歌 鸚鵡洲弔禰正平 琉璃河鐵篙歌

南陽草廬歌

以上七言古 先生詩爲時文所掩茲特表其尤者

摘句 一朶青芙蓉獨立天之半花頭三瓣折隨

日須臾變

望華岳

采菊不盈把意得自忘言誰知東籬下卽

是桃花源

題淵明畫像

相呼不出聲風緊塞人口褰帷助鞭轡慄

若已失手

曉過漳河寒甚四句寫嚴寒未經人道

春秋盛公羊晚出惟左氏毛萇傳葩經初

未立博士遷記藏名山漢末匱方啟唐賢

輩相望幾人學子美韓文得永叔元祐斯

蔚起從來蓋代才不妄求人喜

莫相知行

曉日寒於月空煙併作霜

冬行曉

如聞天下小真作萬山宗

泰岱

門開揖華嶽崖斷見黃河

潼關

鶯花迷艮嶽燈火豔樊樓

汴梁懷古

風聲緣海大山色到邊雄

出山海關

封墓憑公旦題碑待孔尼

比干墓

乾侯終返魯玉璽不歸新

狄梁公

吏兼仙佛隱藝絕畫詩書

贈錢竹初

雞棲時竝轡豹直每均茵

送秦小峴

政已全由甯人將大討曹

詠史

清談果驗銅駝歎肉食安知杜宇聲

洛陽懷古

五國悲深紇干雀闔門枉甚白符鳩

忠武

漫擬武侯誅馬謖略同房相敗陳濤

論張魏公

魏公殺曲端後人多為端訟冤全謝山列端十罪此案可以定矣

松軒隨筆

敢謂吾冠非獬廌定知公膽勝蝘蛇

楊忠愍祠

祕書誦篋張安世椽筆籌邊李贊皇

輓于文襄

竊祿不緣他道進立朝常畏受恩多

退直口號

時耽古籍為良醞間買名花當小妻

散直遣懷

他年傳弟非無意光義黃袍是本謀

汴中詠史

黃袍加身謀蓋出於太宗前人詩未有指出者

聽松廬詩話

張九鍾

字竹南號蓉湖湖南湘潭人乾隆四十三年進士官翰林院編修有笙雅堂集

蓉湖初以明經官郴州訓導乾隆己卯舉於鄉官內閣中書入翰林時年六十矣館中以耆宿相推稱曰蓉湖先生先生內行醇篤四十喪偶不復娶居京師二十年旁無姬侍蕭然一身應官外閉戶著書而已嘗病注疏家以攻擊朱子爲名高於羣

經多所辨證考據精覈晚年以子世浣官曲沃喜  
曰吾父前仕曲沃縣人爲建三不朽祠今吾子復  
官是當往祇謁先靈也笙雅堂詩編年斷自甲子  
以前有洗研嶺雲麓苑東園黃岑陟岵晉遊春帆  
秋帆海南諸草其研京草則庚辰以後往來京師  
所作也山陽阮葵生序稱其志行淳篤蘊藉深厚  
雖尋常筆墨蹊徑皆可想見其爲人今所錄諸體  
春容大雅不矜尙詭異自然名貴蓋於諸張中爲  
最醇矣

沅湘耆  
舊集

湘潭張氏楚南望族文章政事代有聞人吏治則



推湘帆先生坊詩家則推度西先生九鉞經學則

推蓉湖先生九鐔皆淵源於南麓先生松軒隨筆

蓉湖登滕王閣絕句云誰憐孤客渡江來一夕乘

風亦快哉解襲落花楊柳句有人驚道是天才余

謂雖襲句調然秋水共長天一色較之楊柳共春

旗一色有過之無不及終不愧天才也聽松廬詩話

標題 嶽麓感懷用王文成公韻 江上望黃鶴

樓漢口諸勝 早下南天門戲作雲海歌

以上望日吟七  
五古

摘句 乾坤洞庭大憂患岳陽多岳陽樓

飛雲來廣武白口下鴻溝

晚次榮澤

生有虞翻骨歸無陸賈金

客廣州偶作

重泉雙淚斷浮世此生孤

悼亡

寒雲倒映橫汾曲落日斜臨太華西

登平陽城

虞狩至今猶集鳳禹功終古免爲魚

祀廟

燕市衣冠扶正氣匡門風雨葬孤臣

三忠祠

北海居人皆弟子東山今日爲蒼生

同集京師

紅橋修禊冶春詩載酒江湖似牧之誰信

一官煙月地歐蘇鼎立見叢祠

廣陵泛舟絕句

謂漁洋似牧之不確謂歐蘇後惟漁洋是鼎立稱三賢祠則誠然松軒隨筆

李威

字畏吾號鳳岡福建龍溪人乾隆四十三年進士  
官廣州府知府有無名子詩存

君成進士以主事用在刑部二十餘年出爲粵東  
知府調首府君守廣州時方承平粵東號殷富之  
區而廣州亦素稱撫仕君乃澹於仕宦引疾辭官  
制府蔣公攸銓方伯曾公燠皆欲挽留而君退意

已決矣君至京師自營生墳將老焉一日忽不憚  
慨然思返故鄉適聞有舉子下第出都君與之偕  
行家人知之追至中途而君歸志又決矣君原配

所出子孫皆在閩旣旋里杜門不預外事惟以讀書賦詩自娛道光壬辰重宴鹿鳴丙申卒壽八十八餘歲君孫壻謝仰泉茂才

鴻猷

以君詩稿見示因

摘其警句刻之并約舉其事略如此

松心文鈔

鳳岡先生詩云朱子晚年悔來者猶可追自註云朱子六十歲言向時止論文義於日用欠檢點又答張敬夫書云平日解經多是推尋文義近方知漢儒說訓詁之善使人以訓詁玩索經文意味深長先生晚年喜看朱子書觀所引兩條可見朱子自悔其生平著述未善未嘗自以爲是也

松心日錄

摘句

好從人定後徐驗我生前

盡日惟孤坐還家似旅人

共此一輪月悲歡離合并人心紛變幻

魄自空明

月

此二十字說盡對月人心事  
聽松廬詩話

天地之間身是客義皇以上古爲鄰

道源遠出莊生上救苦能開釋氏先

列子

佛家道理從列子來細看列子便知

同上

劫運每乘盈氣後殺機多伏廣生前

數家安穩千家苦一病消除百病生

物理每隨俄頃變世緣難得十分圓

儻來勝友能談鬼絕妙閒身不是官

官身不妙閒身乃妙此句真絕妙

同上

學從悟入功常倍心到收回味最長

心到收回句真內省有得之言凡人怒

氣方盛慾念乍萌能收回真是有味

同上

應酬不到如逢赦剝啄稀聞卽住山

免應酬比之遇赦應酬之苦如此

同上

青山到處堪埋我腐骨焉能尙有情

頗憂泉下還輪轉願向人間永別離

先生富貴福壽乃憂到轉輪又要做人  
余謂轉輪之說渺茫何必過慮 同上

彭輅

字敬輿號東郊廣東高要人貢生官英德縣教諭  
有就刪草詩義堂集

輅弱冠以詩文知名母病晝夜侍側倦則倚壁假  
寐乾隆四十一年拔貢校錄四庫全書館授英德  
教諭英德俗親死瘞淺土三年遷葬易棺以甌生  
女舉其一餘則皆溺輅至召諸生爲嚴戒使改之  
官俸所入悉購書朝夕點勘無間寒暑其學旁通  
百家之言所爲詩淡泊嚴雅非古不道知韶州府  
章銓以牘薦力辭遂引疾去年五十六卒

肇慶府志

東郊先生其志高其行清其言有物其爲詩本之性情以合夫古人法度自成一言先生非可以詩人竟然卽以詩論而先生亦見

康侯文鈔

東郊學博輓馮魚山太史詩自註云丙寅四月三十日夢魚山先生至言笑如平生并問香櫟應時否方遣人采送旋爲叩門驚覺則門下索輓章之書至矣譚康侯曰讀此註知兩先生自有神契而東郊先生騎箕之兆已見於此玉樓星宮廳舉同歸固其理耶張南山曰夢中言香櫟者蓋香火緣之意也良朋入夢同歸道山傳之他時香櫟兩字



可爲朋友添一典故

松軒  
隨筆

東郊先生示泰來詩顧爾甫笑言脫口解章句自  
註云兒生庚戌八月壬子四月抱至齋中索几上  
硯山不與而啼因曰能誦詩則與卽應聲曰求之  
不得又是月學署被水水退兒忽朗誦曰土反其  
宅水歸其壑據此詩註知春洲明經生於庚戌至  
壬子尙未滿三歲而能以經語代話言固知慧業  
文人自有夙根也

聽松廬  
詩話

東郊讀史詩有云方士競神怪虛誕不足錄真能  
救世劫仙止一徐福男女各三千挈之出顛覆桑

田腴可耕逸書完可讀安期與羨門不死亦憚獨  
余舊有絕句云童男童女載三千海上桃源別有  
天堪笑秦王求不死却教徐福作神仙兩詩意同  
而前詩以安期羨門雖爲仙而無儔侶反託徐福  
之男女三千用意尤妙

同上

嚴陵釣臺不少佳作惟七律通體警鍊者罕見今  
見東郊詩得未曾有因亟錄之東京名節迴難倫  
齊與先生作後塵一代竟無官可屈千秋惟爾足  
能伸星於天上還稱客人出寰中詎得臣莫怪西  
臺尋丈地瓣香猶有宋遺民

同上

標題

田家雜詩

六首

讀史

四首

英石峯次坡公

仇池韻

示泰來

觀音巖次秋谷韻

五古

寶藏碑歌

韓公鳶飛魚躍石墨

中

秋次坡公月夜偶出韻二首

七古

摘句

暫憇老樹根外忙中亦靜

田家

外忙中亦靜五字寫出老農淳樸之狀

暫令舍書卷無以安其軀

詠懷

非書無以度日此十字先得我心

引年何必老防滿豈待溢

祿不須多防滿即退年何必老

有疾便辭

見隋書

樵歌歸戶斷虎氣出林腥

宿山家

懶雲依古佛饑鼠齧殘經

野寺

生前身後原無我往古來今賸却誰

位恰稱才真是福隱非求志未云高

功名分淺抽身易兒女緣遲出世難

腰妨束帶原因病口但談書豈可官

憑虛色相原無著本性圓明亦待磨

鏡

乘閒依人憐燕入相看如霧替花愁

簾

白首尙誰堪借力青山憑汝續前緣

杖

暗箭早防蚊作陣睡鄉深讓蝶爲家

帳

陳受增

字至川號雪濤浙江山陰人國學生有至川詩草  
雪濤性愛潔善畫工琴尤好爲詩齊侍郎召南見  
其詩稱賞之客於粵東病卒年三十二子其銘道  
光辛巳舉人四川知縣孫昌潮庠生候選訓導雪  
濤尊甫蓮塘先生在粵久遂著籍番禺故子孫皆

爲番禺人

雪濤  
事畧

雪濤有放歌一篇今節錄之詩云安得騎黃鶴駕  
彩虬乘風上閭闔面謁玉帝請所求我欲明月長  
圓不復缺天地長春不復秋麒麟鳳皇集郊藪瓊

花瑤草生田疇烹龍魚鳳張高宴綠萼起舞青琴  
謳驂以逐電馬載以破浪舟朝從木公夕金母超  
越三島與十洲噫吁嘻人生在世貴適意安能鬱  
鬱長懷千歲憂人謂其豪放學太白余謂六合之  
外縱心所欲仲長統先言之矣

聽松廬詩話

摘句 既與梅爲友還邀月作賓并成清絕境着

我最閒身

小園冬日

不爲名利之閒客便是羲皇以上人

遺懷

三載音書魂夢隔一家骨肉別離多

懷家大兄

守我百城南面樂請纓何似濯纓人

讀書得句

國朝詩人徵略二編卷四十一

番禺張維屏子樹輯

曾煥

字庶蕃號賓谷江西南城人乾隆四十六年進士官貴州巡撫有賞雨茅屋詩集文集

公考文麓公以翰林改部爲曹州知府公其次子也翰林散館授戶部主事歷員外郎京察一等

簡放兩淮鹽運使升湖南按察使調湖北按察使升廣東布政使嘉慶乙亥升貴州巡撫以母老乞養旋里道光壬午服闋入都授兩淮鹽政任滿

召還以五品京堂候補辛卯終於京邸距生於乾隆庚辰壽七十有二子二人長在埏次協均俱業

儒

南城曾公墓誌銘  
曹相國振鏞撰文

公遂養之志既終朝天之車復上

上以公三朝重望一代靈光淮揚爲臥治熟地鹽鐵乃

均輸大綱特授兩淮鹽政公於是斟酌臬離調

停滯粥拜疏一千言奏蠲五百萬雖沈痼藉以稍

蘇而積重終難遽反

同上

維揚爲南北要衝又有平山蜀岡虹橋諸名勝賓

谷開東閣之樽集南都之彥擘紙揮毫散華落葉



攬題襟館詩集遂覺烟月爭輝江山生色

湖海詩傳

賓谷都轉處淮揚靡麗之區而澹於嗜欲公事餘閒時與賓從賦詩爲樂闢題襟館於署後周植花木爲唱和之所屈指官斯土者自

國朝以來無慮數十輩而若風吹網所過無聞獨賓谷挾其縱橫跌宕之才以雄視乎當世令人愛慕比於香山六一玉局諸老不其偉與

有正味齋文集

賓谷爲人文字之好最篤其於文無所不能而講於詩者尤詳爲翰林曹郎不異諸生時爲轉運使

不異翰林曹郎時

淵雅堂文集

賓谷先生蛟龍入懷星辰在手條貫列代包絡羣  
才自螭均橐筆 鳳闕陳書固已杼藻木天熏香  
粉署泊持函箚出理牢盆立綿絕於淮東主敦槃  
於海內乃極一時之盛焉

青芝山館文集

都轉之詩清轉華妙兼綜衆美都轉之文深於選  
學所作擅六朝唐初之勝

八家四六

都轉曾公出承明之廬筦度支之任簪履所盍賓  
館用開顏曰題襟志雅契也才有宋梅籟石不遺  
分無雲泥蘿袞一致平津東閣竟陵高齋以方斯

遊亮無忝已

小謨觴館文集

南城曾公早登侍從晚列節麾地當東南之衝人  
負龍磨之號懷鉛握槩之士靡不捧手而就雖黃  
憑軾結軛之徒亦皆低頭而資月旦世稱三老與  
宰相而齊名

南城與曹儼筆太傅廬南石  
相國辛丑同榜有三老圖

子授一

經固學人之素履

感遇堂  
文集

賓谷先生詩兼唐宋文擅六朝宏獎英才篤嗜文  
字爲兩淮運使十餘年時有熱官冷做之稱蓋謂  
公所好猶是書生風味也夫處膏腴之區膺撫厚  
之仕衆鱗望澤無以濡之則情睽羣卉待暄無以  
煦之則色變以故揄揚固多怨謗亦不少迨事過

心平直道自見如公之履華耽素虛已延才顯宦  
中有幾人耶開藩來粵數有唱酬移節撫黔復蒙  
贈句有云我但知君不能貢漢廷他日中和頌公  
臨別言時無宏博之徵無由薦舉故以詩見意云  
云知己之感中心藏之越十五載道光庚寅復見  
公於京邸公又賦詩見贈余南旋告別公意黯然  
手書一律送行後四句云離別抑何易道途良復  
難吾將約仙侶歸去麻姑壇不久公卽歸道山聞  
公將逝預知時日於戲異矣

聽松廬  
文鈔

賓翁駢體晚多健作山尊所選未盡其美

松軒  
隨筆

賓翁詩不專一家不名一格其樸實適健者既屬  
稱心而言其鏘鏘精深者亦復超心鍊冶性靈佐  
以書卷故非空疎之性靈才氣範以準繩故非叫  
囂之才氣五律多近唐賢七律間參宋體惟能貫  
以真氣乃非貌似古人在西江諸詩家之中可謂  
能自樹一幟者

聽松廬詩話

題太白真

七古

便似太白題昌黎像

五古

便似昌黎聞

四川官兵大捷二首

五律

又神似老杜至屈賈祠南

海神廟兩篇

皆五言排律

氣蒼骨重非平日沈浸於老

杜長排者不能

同上

標題

題陽山石刻韓文公像

特旌貞節曹母

詩 讀陳仲卿海騷因題

以上五古

書李太

白真 顏魯公名印歌 宋三忠祠行

訶子行弔虞仲翔 元祐黨籍碑 紀周

忠武墓異事 題明六君子遺札 蜀道

難 南漢金塗塔歌 韶州諸峽謠 辰

谿藏書室歌 井中水歌爲盛烈婦作

崔孝廉

弼

謝太史

蘭生

黃明經

培芳

三君

皆有邀入羅浮之意賦此答之 松石把

卷圖歌爲張南山孝廉

維屏

作

以上七古

摘句

緬維古詩歌誦之知國政如何近世英有賦無比興

以比興出之則言者無罪聞者足戒且有難以正言必借比喻然後能申其意者知此乃可以讀國風離騷

陶公棄一官良不愧其名其詩高且絕可謂淵而明

卽就陶公名字作贊歎未經人道

人誰無一吾歿後吾安在漫郎得此谿私

之遂百代

活谿歌

僞學徒矯飾剿說程與朱宣公未講學經  
術何有餘公所爲奏議迴非章句儒尼山  
救世心先後其相符

陸宣公從祀  
孔廟詩

北宋以前無道學之名自漢至唐其間  
忠臣義士直行己意轟轟烈烈多有宋  
以後講學之儒所不能及者

生平除讀書萬事皆懶惰

此二句謂  
彭甘亭

僕亦有此病但不及甘亭之才耳

求閒何日得行役是閒時

舟中轎上正好看書此語實獲我心



自昔大奸雄君親有不顧惟與說因果貪

嗔變恐怖

金陵報恩寺塔院

自古大奸大惡惟畏鬼神又每欲借佛  
力爲之解罪消災是以佛法因果報應  
之說於世道人心不爲無補

焦山古梅花遲開如待客其下一老僧寒  
香沁胸膈住持二十年有徒奪其席空門  
猶若茲塵世事何極

宇宙一爭奪之場夏初已有羿浞之事  
何論商周更何論秦漢

吾生亦寓耳何者是眞宅

天地一旅舍也有寓百年者有寓數十  
年者有寓數年寓數月寓數日者雖久  
暫不同其爲寓則一也然則古往今來  
之人皆可謂之寓公

達者昔有言生勞而死逸奈何勞以生又  
復使多疾此身不康彊壽豈福之一

壽而疾痛呻吟或飢寒困苦或多行不  
義皆不如不壽矣故五福曰壽必兼富  
與康甯與好德言之

以上皆聽  
松廬詩話

學從憂患長詩得性情敦

微雨得花性夕陽知鳥心

月應憐夢短江亦厭途長

春與人俱老人如春太寒

吏寒山影裏民靜水聲中

寄南康郡守  
狄湘浦同年

胸吞雲夢澤來上岳陽樓欲與飛仙醉同

銷往古愁

登岳陽樓  
此詩通體  
俱超前四句  
尤有逸氣

九重偏覺春先到萬戶誰如我最閒

除夕  
禁

中宿  
直

夫差久自忘於越樂毅安能下莒城

岳武  
穆祠

月光如此古今共漢水何曾西北流

郎官湖

司馬當年栽柳樹劉郎此日認桃花

復游蜀岡

感逝難禁齊景淚延年各保魏文心

康山登高

芒芒南極環周地點點中原盡處山

洛日亭

舊唐書曰北極當暑度循半

曰南極當暑度環周

祭公何必王炎午知己無如麥述丁

文信國祠

王炎午有生祭文愚公不死公之死以麥述丁力贊元帝

登臨興滅惟看畫忠愛情多每詠詩

淵王楊甫

自知宦拙非耽隱莫救民窮敢厭貧

兩大原爲情種子

此是單句愛之錄之欲覓一句對之

國朝詩人徵略二編卷四十三

番禺張維屏子樹輯

蔣攸銛

字穎芳號礪堂漢軍人乾隆四十九年進士官大學士有繩樞齋詩鈔

公父韶年官知州公生母徐太夫人禱於蘇郡五  
隴山而生公公生於江蘇布政司理問署中

四歲入塾讀書 五歲隨任平度州

八歲贈公罷官公隨侍居寶坻 十二歲喜觀史

十三歲入泮 十五歲鄉試 十七歲就婚馬氏

十八歲鄉試中式出翁覃谿學士之門是科詩題  
仙露明珠劉文清公閱公卷詩云月靜珠騰海天  
高露洗秋擊節稱賞謂此人當作太平宰相

十九歲甲辰科會試中式是科漢軍僅中一名

二十歲以庶吉士充史館纂修

二十二歲散館授編修派校四庫全書

二十三歲充福建鄉試副考官二十五歲丁外艱

二十七歲充貴州鄉試正考官同典試者錢檢討開仕

二十八歲充癸丑會試同考官

二十九歲充陝西鄉試正考官同典試者亦錢檢討開仕

三十歲充河南鄉試正考官是科得吳侍郎

其彥

三十一歲督廣西學政丁嫡母趙太夫人憂

三十四歲補御史 三十五歲查五閘漕糧

三十六歲授吉南贛道

三十八歲丁生母徐太夫人憂

四十歲揀發廣東署惠潮道

四十一歲擢江西按察使 署布政使

四十二歲擢雲南布政使

四十四歲擢江蘇巡撫 調浙江巡撫

四十五歲入都述職預

重華宮茶宴 出都省墓 是秋監臨浙闡 是冬

調河督公以不諳河務憂之幕友徐醇夫孝廉

增

勸公以實情具奏公用其言得

旨仍回浙江巡撫任公因此愛重醇夫若手足焉

四十六歲擢兩廣總督入 覲

賞花翎 公督粵時喚咭喇有護貨兵船擅入內洋  
不服驅逐公飭停貿易夷乃遵守舊制

五十二歲調四川總督 川兵有驕縱之習公恩  
威並濟有犯必懲旋皆帖然 修文翁石室遺址  
延師課士



五十七歲內召爲刑部尙書

賜紫禁城騎馬

五十八歲授直隸總督

五十九歲庭樹生一黃芝旋奉

恩命協辦大學士

六十歲公六旬壽辰

御賜宣勤篤祐扁及福壽字並如意蟒袍朝珠又陳設

古玩九件文錦各九端

公有雪鴻紀蹟詩每首自註至六十歲止

其後丙戌科爲會試總裁晉大學士加太子太傅

銜出爲兩江總督皆六十一歲至六十五歲事也  
公自館選至入閣皆亨衢直上歿之歲以鹽梟一  
事降爲侍郎倥偬入都卒於旅次論者惜之

公性彊記幾於過目不忘尤熟左傳卿大夫氏族  
源流分合條舉無譌至於見人一面與人一言隔  
數十年記憶不爽其居官也明而不苟清而不刻  
所薦舉者多任封圻躋顯秩云

聽松廬  
文鈔

礪堂制府督粵公餘嘗邀余談藝賓主對坐形迹  
胥忘賦詩見贈句云大小雅材凡百五清聲一鶴

上雲間此詩手蹟猶存篋中

聽松廬  
詩話

摘句

問問知向義天地爲銷兵

虔州

公爲贛南道廣昌縣會匪聚衆爲亂延及鄰縣公往激勵士民殲擒首惡餘黨解散

五夜寒蟬流漢上一聲新雁到江南

秋柳

論世要知天下事讀書如見古之人

學本未優先入仕吏猶難察况安民

水號湘灘傷別易地無鴻雁寄愁難

盜已革心皆赤子吏能勤職卽青天

御爵親承甚湛露

賜酒

上親

佛輪常照樂

同春

同樂園

甯壽宮

召見十次

不見柴門惟見竹一窗新綠課兒書

黔州道中

嘉慶己卯九月四川總督襄平蔣公入都  
時方帶領四川土司大頭目諸人恭祝  
萬壽其頭目之先世有以捍禦積功

恩賞至二三品頂戴者公出巨帙屬余撮其事  
略書于白摺子攜入 朝以備

顧問云公自入都至出都數旬中凡奏

御文字及緊要筆札多出余手一日共飯舉酒

向余曰 朝廷若開宏博科老夫薦士君

其稱首矣雖曠昔之閒談亦牙期之夙契

附筆於此用識弗諼

松軒  
隨筆

原缺

所交皆一時名流尤與梁山舟學士相得學士贈以楹聯云松老自能生遠籟雲閒無復作奇峯論者謂浙杭品學兼優人所欽慕者山舟學士而後秋藥太常繼之

全上

唐韓昌黎宋蘇東坡皆至嶺南自古詩人到嶺南者未可更僕數馬秋藥太常送伊墨卿太守之官惠州詩有云嶺南不到豈詩人此語可爲嶺南美談亦可爲遊嶺南者助興

聽松廬詩話

何虎臣廣文與先生之孫芍舫茂才

福階

相義芳

舫所述太常事略由虎臣交來因節錄之

松軒隨

摘句

吾道自斬三不朽百家彼亦一無窮

漫題

子比淵明雖可責妻方馮衍却差賢

五十自壽

雙足忽浮元象外一身如控大鵬飛

登泰山

一身原未將絲挂萬事都隨此祿纏

生

恩讐事激真能現風雨年深亦暗消

鬼

雪滿三春無寸草風高五月尙重裘

肅州

平交落落嵩衡岱俯閱忽忽周漢唐

華嶽

從東郭外從南去第二泉邊第一流

送秦小峴

佩之方寸陟彼幽遐靜斯患息動則害加

玳瑁 佩玳瑁於身若席間有鴆毒則玳瑁自動詳見秋藥庵詩集 聽松廬詩話

張希呂

字載之號東崖廣西臨桂縣人乾隆五十三年舉人官松滋縣知縣有東崖集

君性孝友稍長力學年十九補縣學生乾隆戊申舉於鄉五試禮部嘉慶丁丑大挑二等選融縣訓導道光癸未截取選湖北松滋縣知縣日坐堂皇決民事有神明稱在松滋八年新文廟創修棚土民德之湖北自武昌而下洞庭江漢之水併勢趨東南濱江州縣值盛夏漲溢輒爲災道光庚寅辛卯尤甚江漢數郡城郭淤積潦者數月時荆河亦



盛漲松滋沿河隄潰二百餘丈君乘小舟往來親  
攜米麥食災黎水稍落卽捐金募民趨隄工一月  
而成民忘其災君嘗充湖北乙酉鄉試同考官戊  
子轉餉甘肅以勞得疾遂以老疾引歸君家蘇橋  
驛山水清美良田繞宅桔槔之聲相聞君旣歸曰  
芒屨拄杖出遊田家督耕穫歸或執一卷讀不衰  
著東崖課藝四卷君生于乾隆壬午卒于道光辛  
丑年八十子二允照國學生早卒允勲國學生廣  
東按察司經歷以子瑄爲允照嗣瑄郡庠生

東崖  
張君

墓志銘王戶  
部錫振撰

摘句

別時母無恙歸日母不畱密密身上衣母  
線爲綢繆子行已移晷母淚尙未收甯知  
暫離日卽是永訣秋

述痛

東崖此詩數百字今節錄數句于此此  
詩亦從孟東野慈母手中線一首感觸  
得來合數句觀之較東野詩尤爲沉痛  
凡有老親在堂者誦此詩其敢復動遠  
遊之念否

聽松廬詩話

薄宦三千里離家十五年

畱別  
高城

無人數晨夕與月共徘徊

酬李  
楚船

今夕不除惟酒債半生多負是詩逋除夕

連朝風送迎年雨幾樹花開隔歲春元旦

山骨果然通地脈雲根隨處闢仙祠真仙巖

碌碌三年羈楚澤駢駢七月入潼關潼關

四朝槐柏風霜古廟有周秦漢唐槐柏數百株一代馨

香俎豆新乾隆四十二年奉旨重修華陰廟

徑繞羊腸畱虎跡車如雀舫涉蠶叢六盤山

輿夫兩旁用緯牽輿而行案輿轎用緯牽挽凡峻險處多如此不獨此山

虛心原自推之子薄命無端屬此君夾竹桃

輸他騎鶴纏腰者不上揚州上肅州轉餉甘肅

舒位

字立人號鐵雲直隸大興人乾隆五十三年舉人  
有瓶水齋詩集

君祖大成康熙壬辰進士翰林檢討父翼諸生永  
福縣縣丞君十四歲隨父之永福侍父出鎮南關  
迓安南貢使賦銅柱詩壬寅入都下第居京師發  
檢討君遺書數萬卷讀之年二十四應戊申

恩科京兆試中式永福君歿母沈太孺人固吳人  
遂居吳王太守朝梧擢黔西觀察邀君同行會仲  
苗反大將軍威勤侯勒保檄觀察從征君爲治文

書侯大賞之數召至軍中與計事侯移督四川邀君同行君以母老辭既歸貧無以養仍幕遊近地歲歸省母母壽至八十八而終君年已五十悲痛過度卒時距太孺人之喪僅七十有三日耳子三

人昌枚鎮樓祖椿

舒君行狀  
陳裴之撰

舒生名藉藉公卿間遭母喪哀毀病遂不起所著

瓶水齋詩揚州巴光誥爲梓以行世

舒鐵雲傳  
石韞玉撰

乾隆嘉慶之際詩人相望歸愚守宗法隨園言性

靈君以奇博剏獲橫絕一世余所識詩人衆矣必

以君爲巨擘焉

舒鐵雲傳  
陳文述撰

法時帆祭酒以舒鐵雲

位

王仲瞿

曇

孫子瀟

源

淵

合稱爲三君作三君詠

聽松廬詩話

龍幺妹者貴州土司龍躍之妹也威勦侯勒保征苗檄調土兵適躍病命幺妹率兵馳赴軍門妹年十八身長面白結束上馬出沒矢石間指揮如意洵奇女子也事平侯欲爲幺妹執柯將以歸舒孝廉鐵雲鐵雲婉言卻之因爲詩以紀之其詩有云然脂暝寫蔣三妹歆血請行唐四姑又云軍令靜原同處女兵符端合付如姬余詠其事有云石砭自成娘子隊木蘭原是女兒身乘龍消息方求士

歸妹因緣且讓人閱瓶水齋集因識其略爲修眉

史者添一段佳話云

松軒隨筆

舒鐵雲詩出筆則雷霆精銳運思則冰雪聰明使  
事則觸手成春用書則食古而化相其才氣洵屬  
騷壇飛將所向無前茲編摘句於五言古體中摘  
其有名理者其七言古才情恣肆篇幅多長但標  
其題以備檢閱

聽松廬詩話

標題 太學石鼓歌用韓石鼓歌韻 元祐黨籍

碑 殷三仁祠 望水亭瀑布歌 冰山

曲 題太公釣渭圖 梅花嶺弔史閣部

鸚鵡地 仲瞿改名系之以詩

以上皆七古

摘句

避紂居海濱均是就西伯奈何太公望末  
路急不擇夷齊叩馬來大義痛指斥此老  
壁上觀毋亦面發赤

余亦有句云二老雖並稱功德判輕重  
尙父揚乃鷹伯夷餓猶鳳

嬰沮書社封此類小人行乃悟齊景公未  
必真用聖嬰也再躊躇譎諫本擅勝陰實  
全所交陽乃奪其柄

余亦有句云其君則景公其臣則崔慶



不令仕於齊平仲實尊聖

拜胙戴虛文延周八百祀此豈桓能爲必  
是仲所使孟子論過高五尺稱羞恥豈知  
微管歎孔門有深旨

余亦有句云王道不易行霸功豈可薄  
救時如救病舍穀而用藥武侯王佐才  
自比乃管樂

南面以臨民百官盡如此豈有聖人徒閉  
門作天子

余亦有句云南面曰可使使則非君王

面南乃嚮明卽古之公堂

武王曰人十孔子曰人九漏天蠶媧補陰  
符元女守舜妹始作畫女狄始作酒天子  
試匹夫必用英皇耦周代崇廟祀姜嫄實  
居首佛家觀世音仙家西王母古今數大  
事不出婦人手所以稱陰陽陽陰則不受  
亦無言牡牝而但云牝牡某月繫某日月  
先而日後地天則交泰天地乃否否以數  
對較之奇本不勝偶以身近取之左亦不  
敵右揖讓變征誅實皆由彼婦妹喜與妲

已不幸逢其醜太姒與邑姜幸則享其厚  
崇陰尊婦舌本瀾翻但謂亂臣十人中  
有邑姜則不可不辨余有句云惟婦言  
是用周以此責商豈有周用婦當衆自  
贊揚殷人誤婦人此誤非尋常張禹老  
而昏校勘有未詳今本魯論出於張禹  
犁牛實耕牛並無惡字詰偶然師詔弟詎  
因子戲父

余亦有句云牛刀比弦歌喜之偶借寓  
豈有美其子而反誚其父憑空誣古人

行惡本無據

自歸汝陽田朝發可夕至心仍不忘魯迹  
已遠於費

余亦有句云不肯爲家臣閔子意早定  
汝上乃決辭非必真越境

鐵雲有讀論語詩余亦有讀論語詩茲

取語可互證者並錄之

聽松廬詩話

詩三百五篇聖人所手訂自然古韻通不  
至相逕庭乃獨宗沈約而不依孔聖約居  
吳興地鄉音本未正豈知今韻書并非沈

所定

天地有生氣終古不能死人受天地中同  
此一氣耳發而爲詩歌亦是氣所使然非  
讀書多不能鞭入裏又非作詩久不能跳  
出底不入不知苦不出不知旨經以三百  
篇緯以廿二史縱以五千年衡以九萬里  
鑄出真性情鑿成大道理其氣從空生生  
則惡可已

論詩

空靈必要有實學實學又要能空靈凡

文章之道皆然詩其一端也

聽松廬詩話

公不坐而言亦自起而行始知講學事無

與公重輕

陽明書院

明儒之學多是講陽明之學多是行行

則一端已難講則百端皆易

松軒隨筆

本朝尙考据其功邁前修一變爲攻擊刺

刺不肯休聚如盈庭訟快若夙世仇返諸

著書意未必皆然不

與龔闇齋論考据

有當考據者關乎綱常之大繫乎名義

之重審究乎國事之得失人品之真偽

學術之是非此不可不詳考以核其實

也若夫一名一物一器一藝一音一字  
連篇累牘蔓引藤牽有類胥鈔徒咀紙

費

松軒  
隨筆

事親無他道但如初生時交友無兩端但

如新相知

四句似謠似  
諺至理至言

細數萬牛毛同爭一駒隙

合牛毛之繁庶爭駒隙之光陰  
千頭萬緒汲汲營營括以十字

杜甫尋常債王晞爛熟官

此才非百里餘事亦千秋

尉猶增戊己將乃授庚辰

當年題鳳去此日弔蠅來

此時程不識以下檜無譏

其間王者有名世天下英雄惟使君

武侯祠

本來富貴原如夢未有神仙不讀書

呂仙祠

識曲佳人真絕代愛才天子況同時

司馬相如

五株柳樹義皇上一水桃花漢晉前

陶淵明

尚有牧羊蘇屬國可憐射虎李將軍

王昭君

五三福地誰能到六萬夫人只此傳

茉莉夫人

茉莉夫人一見瓊瑤經一見法苑珠林或云國王妃或云鬼子母松軒隨筆

萬寵貌貅前出塞一牀蝴蝶夜還家

軍中作



十萬甲兵新虎節三千風月舊鰲山

贈王觀察

王觀察朝梧從勒侯征苗觀察由翰林出故有三千風月之語

命中箕斗能成貝身後文章不掩瑜

隨園

宅邊種樹陶元亮架上藏書李鄴侯

雜題

好景最須佳句寫名山難得美人看

麋鹿何曾戀城市鴛鴦原不羨神仙

黃絹碑陰楊德祖絳紗帷後鄭康成

雪來小雅詩無敵人去陽關酒有聲

驛柳

末路才人新寡婦蔡文姬對卓文君

落花

鐵雲九上公車不第借落花以遣懷故有末路才人之感聽松廬詩話